

Nunatta imartaani angalasut tamarmik EPIRB-mik, piumasaqaatitut, peqalernissaat anguniarlugu Naalakkersuisut naalagaaffimmut saaffiginnissuteqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen Jensen, Siumut)

Akissuteqaat

(Ineqarnermut Attaveqaasersuutinullu Naalakkersuisoq)

Siullermeerneqarnera

Naalakkersuisut sinnerlugit siunnersuuteqartoq Doris Jakobsen Jensen Siumut-meersoq Inatsisartut aalajangiiffigisassaattut siunnersuummik matuminnga saqqummiussineranut qutsavigaara.

Imarsiernerup isumannaatsuunissaata sukannernerulersinneqarnissaanik siunnersuuteqartup pingaartitsinera Naalakkersuisunit isumaqatigaarput. Imartagut angalaarfigissallugit unammillernartortaqtarput – aamma inuunertik tamaat imaatigut angalasimasunut. Imartat amerlanertigut uuttortaavigineqarsimaneq ajorput, silami pissutsit allanngorarsinnaasarput tassungalu ilanngullugu sikoqartarluni.

Angallatit Kalallit Nunaata imartaanni angalasut tamarmik EPIRB-mik atortoqartinneqartarnissaat pillugu maleruagassanik atuutsitsilernissaq pillugu siunnersuut, innuttaasut annannissamik periarfissaannik pitsanngorsaanaissaq qanoq ataasiakkaatigut qulakkeersinnaaneripput, assersuutissaavoq.

Siunnersuummi allassimavoq EPIRB 7.500 koruunit missaannik akeqartoq, taassumalu qaavatigut MMSI-mik kodeliinissaq 1.000 koruuneqarluni. EPIRB-it Nalunaarasuartaateqarnermut Aqutsisoqarfimmit, angallatip nalunaarniartilluni ilisarnaataanik tunniussisartunit, peqatigisaanillu angallat imaluunniit umiarsuaq pillugu paasissutissat nunarsuaq tamakkerlugu COSPAS-SARSAT aqutugalugu annaassiniarnermut oqartussanit pissarsiarineqarsinnaanissaannik isumaginnittuusunit, nalunaarsorneqartussaapput. Radioqarfinnik ingerlatsinissamut, ilanngullugu EPIRB, radiunut allagartaqarnissaq pisariaqarpoq. Nalunaarasuartaateqarnermut Aqutsisoqarfik akiliutinik annikitsunik akiliisitsisarput.

PLB-it (Personal Locator Beacon), EPIRB-init immikkoortuni arlalinni allaanerussuteqartut, ajornartoornermi attaveqaatigiinnermut atortutut allatut periarfissaapput. Matumani teknikkikkut sukumiisortai sammissanngilakka.

Minnerunngitsumik isumaqarpunga PLB-it isumaliutersuuteqarnerni ilaatinneqartariaqartut, tassami taakkua akikinnerumik allatut periarfissaammata, EPIRB-itulli pisariaqartitsinerni atorneqarsinnaanerit periarfissaasinnaalluni.

Tamanna peqqissaartumik suliarineqartariaqarpoq, tassani allatut periarfissat assigiinngitsut imminnut sanilliullugit nalilersorneqartariaqarlutik. Ilanngullugu aamma angallatit sorliit immikkut naleqquutissanersut isumaliutersuutigineqarluni.

Naalakkersuisunit taamatut oqaaseqarluta, tunngavilersuutit matuma siuliani allassimasut tunngavigalugit, inassutigaarput siunnersuut inatsisartuni kajumittumik suliarineqassasoq aammalu Inatsisartuni oqallinnissaq qilanaaraarput.